

晚

晴

移

詩

匯

晚晴簃詩匯卷一百十七目錄

卓秉恬一首

沈維鐫四首

顧蕓一首

朱珩八首

謝蘭生十一首

陶澍十首

梁章鉅九首

李文耕一首

王百齡一首

董正揚三首

呂兆麒九首

孫世封二首

汪全泰六首

查揆二首

謝照四首

徐熊飛四首

劉士珍一首

王楨一首

周儀暉十首

路斯雲一首

林家桂一首

施紹武一首

潘時彤 一首

張序 二首

黃培芳 六首

張鑑 四首

穆彰阿 二首

何凌漢 一首

姚元之 十首

童槐 四首

蔣詩 二首

石葆元 三首

陳鴻墀 五首

晚晴移詩匯卷一百十七

徐世昌

卓秉恬字靜遠號海帆華陽人嘉慶壬戌進士改庶吉士授檢討官至武英殿大學士諡文端

詩話文端孝友篤誠初自詞館入諫院封事無虛月巡東漕履行泰安兗州諸縣新得泉四十有三引以濟運典試陝西還嘗議川楚陝老林曩為教匪窟穴今則僑民雜處林深箐密往往為盜賊當專設一監司治之事雖未行而三省皆選將吏守邊實自此議發之兼領京兆十有八年有惠於畿甸迴翔臺省遂至鼎司朝列咸欽其風度

游仁壽古佛寺

一徑入危石亂松青到門隔花僧影淡穿竹鳥聲喧殿古藏雲氣簾高入漲痕偶來尋斷碣零落字無存

沈維鐫字子彝一字鼎甫號小湖嘉興人嘉慶壬戌進

士官至工部侍郎有補讀書齋遺橐

陳蘭甫曰鼎甫侍郎家近陸清獻之鄉承其餘風純乎朱子之學又少時受業於段茂堂之門精通經學不爲心性空言發而爲文爲詩醇實真切出於自然此所以爲有本之言歟方夢園曰詩歌溫厚和平允合風人之旨

謁陸清獻公祠

昭代論儒術當湖孰並衡
廟庭崇秩祀峯泖蔚精英
大道聞原早斯文任獨宏
薪傳尋孔孟統系紹周程
素志惟希聖中年獲代耕
循良敷海表撫導徧膠城
未竟鳴絃化偏教襍被行
歸裝書數卷講舍屋三楹
再迫牽絲起多應薦牘呈
旁咨廉惠愛破格擢賢明
自拜言官責頻聞抗疏爭
臣心孚帝簡朝議順輿評
考績時終忤歸田願竟成
從違皆澹慮義利最研精
督學虛明詔遺編迪後生
千秋承述

作百氏闢從橫詎見門牆峻居然俎豆榮贈階追嚮德賜
謚特尊名世共高山仰人推止水清叢祠猶故里茂典協
羣情絕業眞能荷先型莫與京談經誰繼起瞻像獨攄誠
砌草蝸交篆庭柯鳥和鳴然藜光近照景慕倍心傾

簃樓前輩靜坐澄心圖

先生今之司馬公勿欺爲本殫公忠棠陰三載庇閩浙公
餘退省彌謙沖焚香久已盟夙夜良工善繪傳深衷平生
讀書涵泳富半日靜坐端倪充方其致虛守之篤淵然養
出蒙泉蒙秋水藏珠眾妙具大鑪點雪纖塵融靜極而動
感卽應八窗四達開瓊瓏堅持一心馭萬變如把穩舵帆
江風乃知靜坐非守寂洗心藏密精神通主靜主敬本不
二惟本謹獨箴當躬先生聞道有神契心經政經握其中

醇儒之心名臣業海波不揚田禾豐卽今蒼洱靜斥候琴
鶴移度於幢紅作霖行且徧方嶽調鼎會見亮天功繫余
捧襪寶良誨何異頑石加磨礪元城請事不妄語從今認
取主人翁

陳忠愍公

化成遺像

將軍龍虎姿見知李忠毅駐師吳淞江東南半壁繫逆鋒
何彼猖勇氣彌奮厲古有鑿凶門況已置死地一朝將星
沈海水烽煙沸清人胡逍遙苻離遂驚潰坐看金繒盟灑
徧英雄淚我今瞻遺像餘怒猶裂眦輝赫五雷神威風震
百世由來生天人不媿忠孝字關張豈無命段顏達其志
咄哉偷生徒武剛車自衛

送陳頌南罷官歸閩

太邱一疏重朝端天語親衷眞諫官戀闕未宜投劾早籌
時彌覺直言難歸裝千卷添行色勝地重陽結古歡我亦
鴛湖垂釣客南天極望暮雲寒

顧純字希翰一字吳羹號南雅長洲人嘉慶壬戌進士

改庶吉士授編修歷官通政司副使有南雅詩鈔

吳蘭雪曰南雅故吳中名士爲秀才時卽有風骨以持論議幾爲勢家所中未幾成進士詩不多作而格高音雅如王謝子弟自

有大家風韻兼工書畫

詩話南雅官講學時疏請留松文清內用所旨降官九歲不調後宣宗閱實錄載其在史館撰和珅傳不失實一事嘉其直筆特加擢用生平尙氣節督學滇中最高爲士望所歸好畫梅清超拔俗詩集罕觀僅見一首尙是未登第時作抱負不凡洵名臣之吐屬也

秋樹

孤幹貞心迥出塵不隨凡本共沈淪還期鸞鶴重留跡無

奈風霜老此身大厦於今望梁棟空山到處有荆榛漢家

大將思馮異不爲江潭淚滿巾

時阿文成公初薨

朱珣字玉存號蘭坡涇縣人嘉慶壬戌進士改庶吉士

授編修歷官右贊善有小萬卷樓詩集

詩話蘭坡學博才膽早官禁近晚主吳中壇址閱歷名陽數十年宜其蘊蓄宏深詩集正續逾四十卷模山範水論古述今多主翔實晚作問有高格則更進一境矣

石將軍教場歌

將軍昔日巡團營登壇誓眾三軍驚戈鋌耀雪甲光動蕭蕭萬馬屯無聲闖奴致斃招邊寇土木蒙塵竟北狩九將分兵列九門機宜悉本尙書授尙書是古鷹揚才橫空殺氣轟如雷呼君拔戟速先出斫敵不異芟蒿萊紫荆關前靜烽火免將馬革殘屍裹上皇法駕居庸回鐵券藩封恩

獨荷麒麟閣上開新圖公等合次于尙書郊邱夜宿受嘉
命此意良足霑肌膚無端忽啟南宮閉夜輦遄行代輿衛
謀事倉皇儻不成不知置主當何地中官武士貪大功首
論復辟旌其忠焦頭爛額爭上坐朝衣西市生悲風嗚呼
蕭何雅意曾推轂燕領居然飛食肉廷議早遣金繒和微
欽恐遂終沙陀君王一例修私憾鐘室輦纓服長劍從茲
跋扈誰與倫錦袍玉帶徒紛紜朱三千龍八百半屬平原
門下客至尊朝上翔鳳樓眼見崢嶸五侯宅烏臺霜簡彈
未休失勢今忽成纍囚偏裨漠視老兵笑圍扉草長中宵
愁當時亦有楊宗道褒鄂齊名奮牙爪劔劔臣節知自持
帶礪勲猷永相保將軍將軍胡不去南山邊西湖壩騎驢
射虎消餘年盛衰倚伏古所歎噬臍雖悔空爾憐一介之

夫何足怪守正文臣復同敗歸途太息時擲鞭將星猶喜
臨吳會沈吟往事淪滄桑俯拾斷鏃尋遺槍嚴飈淅瀝氛
埃黃居民指點斜陽外謾說將軍舊教場

過石龍溝

側徑緣孤繩山容忽破碎片石勢飛動層雲起其內巖絕
兩壁立崔嵬土恆戴鬼神守陰崖終古不敢敗陂陀凹復
凸轉入井陘隘馬力亦告乏懦若蛇倒退塵世多險途鼓
勇老行邁但作平等想萬事總無礙出谷天朗開劃然分
兩戒四顧迷人蹤瑤琴瀉寒瀨

獨對

獨對疎窗暝色侵幽居況味歲寒心井泉近戶邀停騎街
樹過檐送噪禽把鏡漸看雙鬢短拋書空坐一鐙深不忘

藪澤雕籠裏莊舄由來總越吟

山中雜詩

螺鬟何窈窕曉霧遮其容如見李夫人深坐綃帳中又若
騰駿馬蹴踏迷風駿眞面自可尋毋畏羣陰攻天光夙變
幻頃刻朝曦紅目翳亦豁然了了金芙蓉

西岡宛而曲東岡平且高白雲常往還相顧不敢驕世人
卑視之終莫傷岩薨況有竹樹森清風被林皋昔年頗荒
蕪頓誅三重茅欲醉酒一尊以賀茲邱遭

兒寬昔帶經近與田舍依吁嗟市闌子弄墨爭幾希我本
識字農喜課桑葉肥閒閒厯阡陌界畫如僧衣吟哦適其
天白鳥時自飛夕陽剛下嶺牛背馱人歸

次韻陶宮保偕同人登東海雲臺山之作

夙聞海上郁洲勝呼吸真能通帝臺三島有人同望去九
峯何日果飛來嵯峨疊磴雲中屨瀕洞迴潮地底雷一自
峴山臨叔子橫揮椽筆亦雄哉

厯厯星辰恍可捫羣巒拱侍作兒孫循圖古每僑青冀攬
景天難辨旦昏駢頂之間誰立極亶洲以外此爲門崎嶇
莫畏邛崃坂報國心同叱馭尊

謝蘭生字佩士又字澧浦南海人嘉慶壬戌進士改庶

吉士有常惺惺齋集

詩話佩士善詩文書畫題畫詩甚多
今僅存一卷詩有畫理故紀游最勝

度庾嶺

雄藩臨楚甸絕塞本秦關地古人留姓衢通國不蠻頰肩
于役苦掛角老僧閒百匝幽篁裏茅亭憩一間

半嶺分寒燠千夫異語言人將山互市天假石爲門細路
雲頭轉危梯日腳翻薄寒風出竇聲挾萬松喧

四柳樹納涼

人心屈平旦清氣納靈府一夜澄其源百毒不敢侮長日
困炎蒸午夜息熏煮專心盼黎明終宵不徂暑初陽露血
殷高岸束牆堵大魚入敝笥那得不跋扈稍喜三汊河未
離四柳樹展席隨陰涼瞬息徙三五其上枝葉踈穿林漏
飛炬其下螻蟻攢剝膚先噬股欲靜反擾攘自辰逮中午
蘊隆歎蟲蟲無計與之拒玉池儻生肥甘露自嚙吐養其
元冥根庶俾熱腸瘡

夜過黃茅峽宿峽口不寐

千篙拄灘行十拄不失一人頑詎如石悍鬪乃竟日船迴

沙嘴平水轉峽角出黑暗支祁潭深阻老蛟窟餘力且支
撐觸險肆奔突熊望赤蚪謂野燒遠映路未失誰敢然溫
犀照耀到水骨荒洲暫停橈風大水滴沕蹲夷擁孤裘寒
減心更慄嗟哉慘舟人爾勞我弗逸爾勞暫安眠我勞何
時畢

自花埭至羚羊峽

又被饑驅出藏名悔不深生涯舉子業杯酒故人心花塢
闌香徑客船依野陰晚風留宴賞沙渚有歸禽

鳴榔駕巨浪早歲氣如虹吳楚燕齊境風霜雨雪中潮流
幾迴轉嵐翠半空濛息影無長策飄飄又短篷

浩浩西江水來從萬里遙北爭彭蠡大東赴祝融朝蛟鱷
青春蟄黿鼉白日驕沿隄多汊港薄暮敢停橈

小渚不盈掬猶留昭諫名入山愁夜雨歸策喜天晴金粟
香薰袖瑤珉翠滿罍嗟吾二三子曾闖化人城

瘦幹南田樹高崖大滌山林深村可覓橋細檻容攀破刹
碧雲外危磯白浪間喃喃僧乞食汝亦不能閒

爲愛青山好船行不厭遲東風催發早西洞失探奇曲渚
雲腴聚前人月斧施異時停峽尾破壁攫蛟螭

果然靈峽石大似二禺峯上有雲間寺旁無竹外松壁門
橫截馬山脊互蟠龍未蹴桃花漲吾游樂沈溶

陶澍字子霖號雲汀湖南安化人嘉慶壬戌進士改庶
吉士授編脩官至兩江總督加太子少保銜贈太子

太保諡文毅有印心石屋集

詩話文毅督兩江更革漕巵諸政其奏
議爲世所稱餘事作詩亦莊雅可誦

王漢衢明府自題撫琴圖云人心盡如此天下自和

平蓋唐人撫琴句也爲賦一詩

治國如張琴此中有精理安絃操縵閒不偏而不倚中聲
本在心其妙應以指先生操元音志山復志水一彈再彈
時半松半篁裏能令勞者息能令疲者起人言先生琴古
調非今比先生曰不然人心盡如此但令心和平道也通
乎技雲山高峩峩煙樹清瀾瀾何當鼓天風一洗箏琶耳
和高麗許澹岩櫟韻

夙聞東海士磊落多英姿尙友溯殷遺矧茲生同時往晤

洪義錫

與權

永佐

其人皆翹奇款款語情愔敦樸無澆漓

今子矢來游復此能相隨發聲叩金石誼古無近思所願
義無渝相見誰云遲

舟中望棲霞山

棲霞如麗人秀質何葱蒨掩袂大江隈可望不可見飄飄
雲氣深曖曖樹陰轉舟行煙望遙時復露一面上有最高
峯矗起旁無援慨想登峯人俯視浮雲變何當御天風從
之冷然善

題墨蘭贈尹月三

先捷

虎頭畫法古無比今之畫者恍惚似蘭係顧南雅作煙墨數點出
新意勃勃清香生絹底根荖故與眾卉殊不俗之氣如吾
子持歸張向畫屏前秋來好夢湘江水

爲董眉伯

正揚

題秋山聽瀑圖

石徑葉老層巖封一雨洗出青芙蓉秋聲浩浩不到地天
矯惟見雙白龍急溜忽瀉雷裂石餘點亂落風入松天門

萬丈立雪色絕壁但有微雲通漱流得此百自在俗響不入幽栖胸君家羅洋青田東海門日激扶桑紅天台雁蕩接咫尺往往風雨迷蛟宮卧游幾歲在林下圖成紙上猶淙淙月來風色太作惡禾田灰起燒晴空去冬無雪至今五月尚無雨安得懸崖之匹練化爲霖雨蘇三農大瓢儻卽分點滴相期共踏赤鯁公

李芸甫水部畫松爲子佩參軍賦

李侯畫松如老螭著紙俱作鱗之而破空勢起不得住風雨一霎迷天池阿兄矯矯歲寒操秉質況是山林姿特令寫此好根節要使俗子驚鬚髭顧我園荒舊三徑故物入眼宜爲辭披圖一笑鎧影黝霜華搖動青銅皮古香滿地寒不掃黛色參天疏自支想見蕭齋挂壁夜定有雲氣歸

高枝

題法時帆前輩

式善

五家詩龕圖

五家謂盛山甫舍人蔣醉峯學正玉

達齋中丞羅兩峯王春波兩山人

梧門居士金仙人說法今現詩龕身三車盡掃辟支果拈
花一笑諸天聞眾人耳詫勝義諦謂此夙識無依因豈知
甘苦悉自得十年面壁惟精勤維摩丈室柳灣側翛然一
榻辭俗氛當其瓣香坐嘯詠梅檀薝蔔交氤氲睽睽雙目
但內視須彌芥子俱微塵輕量主客滌宗派教化廣大開
覺門遂令好事入圖繪山水布置爭鮮新小橋十里樹一
色綠雲圍繞詩人村五家寫景各入妙不同其貌同其神
詩耶畫耶人斯在鏡花水月皆天真此中三昧未易識縱
觀吾亦聊云云

鳳縣道中

一髮青天在巉崖束小溪木敲危石出水漲斷橋低漸遠
黃牛堡初來白馬氏鳳州無手柳村酒醉如泥州宋人云鳳州三出手柳酒

五丁峽

到此真奇絕山奇石更奇徑懸猿狖恐險鑿鬼神疑水作
千盤去天將一綫窺金牛如不入萬古只荒陲

寄懷唐陶山先生

十年鄉國耳才人秋水江南入夢頻作宦一時推古直論
詩隔世有前身近聞搗刻唐六如遺集並修其墓地當湖海難爲客胸貯

周秦不是貧遙羨鯉庭春最早梅花添放幾枝新令嗣鏡海庶常

時自翰
林假省

梁章鉅字閔中一字茝林福建長樂人嘉慶壬戌進士

官至江蘇巡撫兼署兩江總督有藤花吟館詩鈔

詩話茝林早歲通籍數歷中外其詩才學博用筆生健喜選險韻而能控制自如翁覃溪言門下詩弟子百十輩茝林最後至而手腕境界迥異時流不名一家而奄有諸家之美云

李陽冰般若臺篆字歌

衡陽峒碑不可捫岐陽石鼓科臼翻侯罔控飛籀史化上
蔡真刻焚餘瘢吾閩荒遠蹟愈渺按圖十一猶疑慳神工
鬼斧鑿不到搜奇往往嘲巖巒山靈奮激海若怒風雨倒
捲蛟螭蟠夜深鎖紐向絕壁伶俜百怪走且顛誰其尸者
唐李監長劒快戟森烏賁三才萬彙睨儻忽揮斥流宕窮
倪端寶鼎躍水有神助古溜過石無新痕坐令光價耀寰
宇仰揖漢碣晞秦甄世間精詣豈逸致當年篆室窺真源

以豐同豐中郎戒將束作宋丞相憊苦心訂訛告採訪想
見雪泣忘眠飡千秋萬歲自有故造化亦樂當鐫刻我來
繭足奈屢失乍見畫肚愁難援圍尺深寸語易曉匪誇趨
趨兼親輒香臺銷歇般若寂壯觀孰識華巖巔紛紛耳食
稱四絕那得精鑒祛煩冤倚裳聯襪吟不語牧童愕貽山
鳥喧呼觴厯厯記跟肘走筆欲補歐陽篇

夜宿景山學齋

天外鴉聲渡苑牆千林晚景送斜陽雲光乍與山顏紫霜
意猶容瓦色黃窺戶月華連北極隔櫺蟲響盡東箱滄江
青瑣俱無著漫聽西風玉漏長

安聖寺

索居習寡歡幽探答羣竦輕輿轉林筵新術陟麥隴迴巖

忽扼塞複澗僅容甬側疑地脈盡間出天宇聳朱曦隱重
樾紫霧露修拱溪山自一家猿鳥若相拱礪戶叩幽寂庭
幡愜飛動侵衣薜色潤闕履藤根輦寶泉有深清簷竹無
雜冗香廚聞齋鐘禪械破長葶雲還鶴亦倦泥滑鴻已磔
歸蹊逐明蟾吟緒抽繭蛹

虎嘯巖

首路平肩輿伊軋如過艇延緣惑新蹊恰有山靈請嵐光
露西岫雨意接東嶺始知集雲關尚在凌霄頂

巖在凌霄
峯南路口

有集雲關
三字石刻

騰空橫卓閣俯覆作幽屏迴身迷去蹤良背詫

來境誰煩巨靈擘作此廣廈迴法雨懸有聲賓曦悄無影
鎮心覓泉竇惜力支茶鼎逢僧不言禪說虎久無恠焉得
山中人招我蹈箕顙斯游固非偶此意竟誰領頗嫌執圖

經瑣瑣劃八景

九仙山丹井歌

月煙黃黃日煙紫井幹苔繡轆轤毀湖濬瀾翻失九鯉九
仙老衰叫不起當年呼龍飲龍津金龜刮海海似銀虛皇
押敕授爐簡井畔開明鎖玉檻月爐忽報丹火青白男赤
女聲嬌備此時此井湛復滿九仙掉頭不肯管金天掣日
玻瓈搖斜山風雨盤靈簫秦皇漢武汲不得淮南雞犬久
垂隔火井蕭寥丹井塞銅盤仙人淚沾臆仙乎仙乎亦何
益

鼓山絕頂望海歌

千山萬山列眼底倚天空碧不知止眼中滄海小如杯海
上浮雲白如紙流蚪一髮來青青鯤身隱約浮東甯天吳

陽侯億叵測蜃樓倒矗蛟涎腥昨夜黑風吹海立陰火難
消水仙劫天末遙遙蜃客愁浪頭隱隱蛟人泣我欲乘風
遠扶搏樓船突兀誰能攀徒有襟期偃溟渤惜無長策回
狂瀾忽憶神仙隔縹緲蓬萊清淺無人曉排雲但望金銀
臺珊瑚枝老蟠桃小便要東舉若木華羣仙接引如蟲沙
拍肩教我洗毛髓應龍十二空衙衙知不可得下山去富
貴神仙亦朝露不如呼酒東際樓

山中樓名

海月山風足良晤

芷汀招游崇效寺爲餞春之會疊前韻奉答

春城飛花散輕煙客子嬾過春蠶眠惜春重赴看花會餞
春始晤花當憐城西十里棗花寺古時已擅花木妍妙嚴
自合佛位置幽勝詎與時推遷石林先生興不淺踏花驄
馬無淹延芳辰恰趁天日麗小隊猶作風雲騫紅塵九陌

徑漸轉敲牆已露紅欲然入門花畦紛照眼蘭苕翡翠難

爲鮮態濃意遠不可耽國色豔奪珊瑚鞭揭來更入散花

室詩龕細認靈山顛從寺僧借觀拙菴和尚青松紅杏詩卷青松紅杏見真

實初地想見神翩翩墨緣所在各印可封侯作佛誰後先

王朱而降逮初白風味遞衍騷雅仙吾師詩又一神理盤

陀獨現曇花嫣謂朱文正師題句雪泥留爪過百載露電掣眼經

十年效顰幾饒豐干舌擇地何如萬斛泉媿我春風雜桃

李曾經鐵網千絲穿種花仙翁早飄舉探花弟子方差肩

厘從尊前憶北海焉得空際招成連對花徒倚夕陽暮坐

花重與開瓊筵花間詩簡忽飛到是日蘭卿未到而逼人

咄咄下水船才多詎患洛下陸口辨弗數甌東娟吟場角

逐本韻事買夏勝會將蟬聯先生何不作虎帥揮毫染盡

山陰賤十盪十決各奮迅再接再厲休踟躕弩餘自嫌詩
膽怯棒喝須待禪心圓

芷汀喜談禪

詩逋更比花事急且應恕

我秕稊前

蘇齋觀岱頂秦篆新剔十字

泰安令蔣伯生因培拓寄

名山第一磨厓奇古今第一小篆師嵯峨文字壓鍾隸伯

生曾跋曹丕碑

虞伯生題鍾繇爲曹丕作勸進碑詩云李思文字更嵯峨

又一伯生生

苦晚汲古動我深嗟咨廿九字石毀復得七十餘載神護

持岱史縱迷北平許具名猶備去疾斯夜虹熊熊玉女池

風雨離合元君祠殘星鎮地作光怪瀆溜裂石無差虎飄

然片紙遠飛到挂壁隱隱森鱗而如麟一角鳳一羽已冠

石墨千圓驪申屠徐鄭並斂手何況汝刻之罌遺我生五

嶽未涉一遠夢直躡鸞峯陞安能三日坐卧對更胝右手

精氈椎墨綠漫託劉斯立眼福敢比江鄰幾先向蔣侯乞
拓本岱雲冉冉來勞楣

姚少師菴

岫雲寺後白雲深省識西來出岫心流水尙疑嬖女晉好
山如對泐師吟當年簷瓦飛龍識終古盤陀病虎暗爐火
淒清鐘乳澀更無慶壽唾壺金

李文耕字心田號復齋更號壘石昆陽人嘉慶壬戌進
士歷官貴州按察使有喜聞過齋詩集

詩話復齋學宗朱子服膺陸清獻公張
楊園先生詩與清獻相似多見道之言

都中與趙直夫孝廉別

欲別頻謀聚離懷苦不禁切磋吾輩事溝壑古人心雲指
黔山近波愁濟水深他年此共對何以證胸襟

王百齡字芝田長安人嘉慶壬戌進士改庶吉士官直
隸知縣有詩附其祖元常西園瓣香集後

園居卽事

性僻耽泉石春園俗事稀苔痕埋屐齒花氣上人衣燒燭
月還瘦數榮雨早肥韶華堪領略雙燕故飛飛

董正揚字眉伯號曇柯泰順人嘉慶壬戌進士官大庾
知縣有味義根齋詩藁

百丈口放舟

峽束高天迴輕舟此溯洄碧環千樹合青剗萬山開篙影
穿波曲灘聲得石哀蒲帆十八幅幾日到松臺

葛嶺懷古

集芳園北玉巖東多寶樓臺想像中蟋蟀鬪殘天水碧鷓

月日集言圖卷一 下
四
鵠唳斷木棉紅書傳玉枕千年重畫笑螺屏十事工隄樹
湖波來息影野梅無處問春風

湖上晚歸

拗得花枝插錦韉斷橋東畔水亭邊柳陰人繫留泥艇荷
徑僧搖盞飯船古寺鐘聲催暮色夕陽樓影浸湖煙歸來
攜取清溪石供向雲窩伴醉眠

呂兆麒字星泉旌德人嘉慶壬戌進士官西昌知縣有
宦蜀詩鈔

下寺峽中見山石奇古輒賦

昔年客京華居宇宅平曠遙遙見山色心喜神亦暢幽討
歎未能懷抱常怏怏分符赴西蜀自喜愜所向嶺度秦鳳
高意已小芒碭邛嶰近見經岷峨紛在望劒門天下險羣

岫森疊嶂宦跡留三年目不迷背向開軒畫新就日日對
屏障奇姿晴愈出秀色默相餉頗謂山止此傑特無與抗
昨過下寺峽到眼驚新剏切雲鬱岩巖肖物工跌宕或深
如堂廡或熏如帷帳或陳如樽俎或覆如瓶盎蹲或如虎
豹列或如兵仗堅或如鑄鐵密或如聯續輪囷謝推挽瘦
削空依傍怪怪與奇奇變幻不可狀黃沙接馬鹿雙峽浮
春漲掘土露峻嶒傳說語疑妄英靈毓瑰器富媼發新藏
神斤運刻斲天巧呈花樣對此玲瓏影驚倒般爾匠何當
採嶙峋裝載盈歸舫位置小園中聊佐詩人唱

晴後復雨

昨宵月色明如水萬里長空鏡影開今日雲容濃似墨千
山齊送雨聲來巖城涼燠朝昏變棧閣陰晴晝夜催賦罷

愁霖望新霽且憑軒檻上高臺

詠史擬李義山

世事何由得盡同萍飄梗斷總西東戴星未覺征衫溼多
露方矜舞袖工信有雨晴持鷸蚌可堪得失較雞蟲元規
卻憾塵猶少不盡人間便面風

述懷

離鷺別鵠知何似自歎飄零天一涯斜日盡堪悲宿草餘
春無意表孤花也曾伴我題黃絹猶記窺賓隱絳紗往事
追惟難遣處聊將痼疾託煙霞

有感

沈醉西風有底愁冰輪重見月如鉤爐藏桂燼香猶熱鐙
地蘭缸燄未收可憶堦鄉騎竹馬難從童阜問金牛輸他

意緒澄於水靜夜吟詩獨倚樓

漫興

車塵馬跡徧通闔避得喧囂自解顏隨地逶迤春澗水對
人偃蹇半晴山蟬吟綠樹林方靜鶴拂青雲夢亦閒盡日
題詩無綵筆可應編集續花間

有感

淪落風塵心力殘天涯魚鳥尙求安萬釘榮欲辭犀帶小
几閒思隱鶻冠今歲遠期來歲好抽身翻較致身難深庭
暮雨蕭蕭下清夜愁懷感百端

讀書有感

欲採穠花可自由春林多是不宜秋相如解作長門賦竟
遣文君怨白頭

惆悵春情爲惘然秋風團扇不須捐歸來收得盈車果應
是安仁最少年

孫世封字襲公許州人嘉慶壬戌進士有森圃存藁

送李寅菴進士游長安

囊橐澀尤甚文章售本難不愁關塞險惟念客衣單風急
河聲壯霜高嶽色寒故人揮手去匹馬向長安

泌陽道中

山行不見日泌水望迢迢嶂削雙屏峻途明一綫遙泉飛
疑帶雨柳卧欲成橋近郭岡巒迴驅車上碧霄

汪全泰字竹海儀徵人嘉慶甲子舉人東河候補同知
有鐵盂居士詩藁

舟次鬱水

赤日銜雲卧江底倒射黃波溼船尾蒼雷注地飛紫星龍
子擾煙呼百靈青桂紅蕉滿沙渚搖蕩江風半天雨古穴
蠻鐙十丈高猺人夜起凌空語萋萋月氣成餘霞老魚夜
食句漏砂腥涎滴綠掃不去明日石牀生毒花

湯陰

煙樹夜迢迢秋涼白馬驕繁星下河內斜月見中條世事
悲搖落羈心久寂寥侍中祠宇在風烈感前朝

發平樂至陽朔

嶺門椰樹風騷騷臨賀故城天半高猺姬雨種作蘆寨洞
客星居開石窰伐船朝從浦口入慘澹中流日將黑清霜
暗下獨鶴巢野火潛燒老猿窟山根泊時寒浪清榜人夜
食當明星木瘤浸泉苦藥氣石乳掛巖枯筍形幽景淒淒

興無極前頭秋險灘聲急客子淹留惟暫時明晨更下湘源驛

過武昌縣作

雞鳴關外綠波平樊口潺湲水氣明疎柳不知陶侃宅亂鴉遙下呂蒙城興亡一塔山城晚老病扁舟水國晴欲上南樓嘯明月飄搖書劍愧平生

建昌縣宿余氏祠堂

暫借空祠宿黃昏不見人風鐙尋縣吏塵榻傍山神半夜明殘月孤峰寄一身杜鵑啼未歇衣上又行塵

咄咄

咄咄書空恨悠悠避世心愁兼秋樹亂病與夕陽深蘚壁朝陰早蓬門夜氣侵親朋長不見多難更相尋

查揆又名初揆字梅史海甯人嘉慶甲子舉人官薊州

知州有菽原堂集

詩話梅史工駢儷之文詩雄健清峭嘗有落葉句云
低頭一笑渾相識見汝春風綠上時又有舟次句云
我獨丁甯牢把舵順風還
較逆風難蓋皆有所諷也

謁張忠烈公墓

樓船兵氣黯滄洲丞相祠堂叱牧牛雁宕寒深虹貫日龜
山濤落雪驚秋頭顱已送田橫島妻子虛隨范蠡舟更向
江南懷閣部梅花嶺上暮雲愁

與吳茂才夜話

憐君似秋雁易起旅人愁夢醒堪雙杵鐙寒雨一樓黃花
吟影瘦白鷺鬢毛秋無那聆情話荒雞亂唱籌

謝照字裕菴浙江山陰人嘉慶甲子舉人官陵川知縣

有蕉影齋詩

詩話裕莢作芳草山仙山樓閣諸詩一時有謝芳草之目詩格清雋如其爲人

蓬萊閣春望

蓬萊高閣蓬萊山蓬萊客欲淩煙寰春風有力爲送上直
到縹緲虛無間三月韶光舒錦繡憑高一望開心顏爭流
縈繞萬雲壑競秀羅列千煙鬟重青濃碧不可畫照以麗
日紅紫殷重瀛指點路不遠雲氣一道光爛熳我欲因之
度弱水直叩故山白玉關列仙舊侶重相見手采琪花瑤
草還種向閣前并閣後好與萬家春樹相迴環

同過友人村居

十里輕波泛小舟眼前景物特清幽村藏紅葉蕭蕭雨門
對青山面面秋市遠盤餐能儉約談深主客轉風流襄陽

舊有重陽例可許還來就菊不

初夏漫興

繞徑陰陰綠已肥端居鎮日掩雙扉
午風石磴桐花落暮雨池塘燕子飛
把卷長吟消永晝倚窗凝望送斜暉
呼童細聽茶鐺沸自試新成紫芋衣

普明菴用坡公原韻

溪流邈迤石徑細午風不啟重門閉
尋幽信步入山來空翠不知滿衣袂
禪房磬逗白雲深日斜猶作句留計
生平空復愛居山佳游卽此殊難繼
歸去空齋一夜眠定夢溪光照鬢髻
老衲如何笑不言媿爾出塵余入世

徐熊飛字渭揚號雪廬武康人嘉慶甲子舉人翰林院典籍銜有白鷗山房集

詩話雪廬少孤寒事母至孝詩有才力頗存唐
賢軌轍晚見知阮文達舉其學行得典籍銜

游雲岫寺

落葉四卷迷松根山風吹之如有人草間一徑出嶺背石
氣上逼秋空雲千年古寺冠峯頂佛鑪無火僧關門野猿
竊果墮檐瓦驚起蝙蝠飛承塵階前老樹雷斧劈長藤倒
挂花續紛當門巨石平貼妥瀑泉赴壑風霆奔夜深飢虎
癢磨疥爪牙印齧青苔痕森然動魄不能住出林步步循
荆榛天時人意兩清曠在野且與芒屨親題名石壁記幽
興入山不早山靈瞋

白蘋洲懷柳文暢

山椒激微風陵茗媚芳澤遙瞻隴首雲忽憶瀟湘客汀洲
澹容與一鳥破寒碧波影霽澄輝蘋花吐微白何處蕩舟

人漁歌遠天夕

與京口諸子重登蒜山春波閣

蒼然淮楚到尊前勝侶重逢啟別筵
高樹濤聲過白晝大江帆影落青天
驚心風雨登臨日回首英雄戰鬪年
十萬長刀殲寇地那堪海道尙烽煙

林烈婦詩

清溪林氏女嫁乍浦顧氏子夫故無賴姑復淫悍或悅女殊色以金錢餌姑及夫女

矢志不汙受炮烙死年二十三時甲子正月晦日

可憐明月光不照磐石心誰使姑不容妾心悲至今妾命
春蠶絲絲絲腸斷絕多謝惡少年黃金買顏色茨菰復茨
菰綠葉何翩翩妾不得姑心妾死無足憐如何蘭蕙花變
作菴菴草山下青梧桐姑惡嘯至曉

劉士珍號春舫建水人嘉慶甲子舉人官香河知縣有

知不足齋詩鈔

宿宜良龍山寺

冷逼諸天夢山樓對佛棲霜催蟲語急雲壓雁聲低歲月
驚彈指風塵悔噬臍蒲團清有味便想息輪躡

王楨字倚吟號獅巖秀水人嘉慶甲子舉人官甯朔知
縣有絜華樓詩藁

宿寶晉書院拜蘇米二公像

庵中一老顛復顛髯自外來仙乎仙松關靜掩聞剝啄磔
磔驚去幽禽翩詩清韻徹上方磬茶甘味品中冷泉夜潮
風起奏韶樂晴峯黛掃呈嬋娟江山如畫得且住主客一
笑真何緣壁間片石認遺像座下瓣香思昔年千春遙遙
曾樂此此樂至今猶目前

周儀暉字伯恬陽湖人嘉慶甲子舉人官鳳翔知縣有

夫椒山館詩集

詩話伯恬工六朝文詞尤深於詩擬古諸作往往逼真與同里陸祁孫李申耆並著盛名中歲奔走東南諸名郡足跡半天下爲詩尤激昂慷慨數奇不遇晚始宰一山邑不三載歿可悲也

偕王三遠甫文源看落葉

秋柯無靜音風過有鳴籥卷簾庭草深寒綠動蕭索娟娟天際流簌簌林間萼相觀亦夷猶甯教愴零落達人識心性世事工羈縛涼飆開化機意興俱卓犖浩歌卻塵滓晤對起清廓回首山月生流輝上簾幕

渡彭蠡湖口望大孤山

春風出江城千里送行跡朝辭潯陽郭晡擊湓口楫回首眺大孤危嶼立空闊中巒靜容與澄暉覽日夕亭亭何處

仙縹緲迴殊絕平湖麗清鏡修容俯深碧氣與江勢趨神
俱旅心積斷雲掩蒼莽殘照薄敲仄征車重回邁延佇但
今昔緬彼百尺峯嗟此遠行客

自岐嶺放舟至青溪

萬山迴一川旋轉入空曲輕舟歷蒼翠百折到深綠泠泠
雲際風淅淅石間瀑羣峰得花意眾鳥襲珍服炫奇斯恍
心過險不瞬目何如山阿人誅茅自成屋

中宿峽

巨靈斧天根斲玉一萬仞雲霞幻幽樵風雨逼迢峻厂樹
交空嵌岑苔互薄暈驚禽拂波駛落翠襲衣潤林光澹日
氣澗響寫花韻叢綠疑無垠羣香但相素扁舟溯春漲篙
楫競分寸靈境開清虛艱程若輕迅思元本初志招隱豈

非分遂令紆歸心前途緩遙趁

山溪夜坐

疎砧清切夜闌干小閣臨溪四面寬半下西風山翠冷獨
看明月劍花寒激波有夢流難去磐石無心坐覺安敲枕
乍眠眠又起卷簾秋在五雲端

隔岸樓臺一水分山容全寫李將軍拂衣星氣青如雨出
岫林光綠到雲中夜蛩鳴金井暗下方鶴語碧霄聞輪他
花霧香塵裏銀燭初殘酒半醺

偕邵文綸三登懷遠青雲樓眺荆塗兩山作

長淮東下兩山尊天作巍峯壯此門金簡承華開日月元
圭拜手奠乾坤僑名已變當塗國遺迹猶傳禹會村閒話
懷襄溯前列直疑疏鑿尙留痕

帝鄉甥館已難尋
原隰眇眇直到今
童律無功宜有罰
防風後至亦何心
荒墟廟貌成蕭瑟
澤國山圖想播琴
嗣服鈞臺帶遙甸
史臣猶侈說辛壬

答許明經

所望

荆山山前三日雪
老樹奇僵竹枝折
縣南許子寒閉門
惠我新詩句清絕
元言如環筆如鐵
論說波翻思雲譎
琅琅擲地金石堅
詡詡迴春肺肝熱
宣州栗炭紅地鑪
步廊深幕交流蘇
十千美酒二八姝
風力不到年光殊
不如此詩溫且腴
煥氣襲我心神愉
窗前坐對兩峯白
恍是吉貝鋪天衢
秦淮八月勝流集
一萬人中與君揖
花光兩行盡回首
山翠四圍皆拱立
此時奇氣不可當
龍劍天矯空天翔
長風挂帆去無迹
江水漠漠煙蒼蒼
晨星蕭條悵何及
十

六年來成瞬息去年重見蔣山旁已改故人鬚鬢色今來
訪君卞和洞抱璞前機有餘痛酒酣慷慨話昔游尙覺飛
騰意殊眾棲隱聊爲小言賦乘時合奏河清頌不見枯原
草色新東風已破春池凍

揚州別朱學博

翔鳳

家進士

濟

十年不聽廣陵簫淺醉重尋舊板橋忽爾傷心成雨別可
能奇氣爲花消紅窗悄夜歡愁夢碧月春江上下潮仍是
扁舟送歸客熟梅風裏過金焦

路斯雲字矩庵號得青畢節人嘉慶甲子舉人官涓潭
教諭

閒行

閒階苔聚綠紋生單袷迎風曳履行何處歌商同古調幾

時荷笠事歸耕，蝶衣黏雨飛。回重蛛網隨，陽補綴輕長日。
增長衰鬢短，那能含影佩蒼精。

林家桂字辛山，吳川人。嘉慶甲子舉人。有見星廬詩藁。
舟晚

林塘寒澈晚風清，葉葉帆圓客舸輕。沿岸人家團竹暗，傍
巖漁火隔煙明。江沈夜氣山無影，櫂破波紋月有聲。擬向
驪珠臺上過，淩晨小立聽龍鳴。

施紹武字樹之，號石樵。錢塘人。嘉慶甲子舉人。有靈石
山房藁。

朱朝散郎孫公墓

公名察，嘗使金。問二帝起居守節，不屈。金人裹以油絮焚之，罵不絕。

口而死。墓在集仙宮西，按縣志：公未歸，骨疑爲葬衣冠之所。

甘蹈焚如禍，論忠到此難。身隨一炬燼，骨並兩宮寒。和議

中朝恥衣冠故壘殘翻嗟冷山使生得返臨安

潘時彤字紫垣華陽人嘉慶甲子舉人

途中卽事

一夜翻盆雨千山瀑布聲長風吹漢水落日下褒城北棧
初傳箭西州已罷兵雞頭關上過誰是棄繻生

張序字鷺階雲南趙州人嘉慶甲子舉人有雲癡詩鈔
凌虛閣夜坐

蕭然一榻野雲灣縷縷春愁未盡刪祇訝濤翻孤枕上幾
忘樓在萬松間漁鐙對出東西岸鐘韻周回上下關爲愛
沙村新月滿起舉疏箔看蒼山

飛來寺

千年薺蔔四圍開香裏悠然上古臺三塔遠從煙際出一

帆斜自洱西來旗亭過雨行人集梵閣銜杯老衲陪醉後
休談天寶事夕陽荒驛野猿哀

黃培芳字子實號香石香山人嘉慶甲子副貢官陵水
教諭有香石詩鈔

秋日郊行

平蕪落落野煙環稻穫雲空指顧間隔岸人呼秋水渡倚
樓僧看夕陽山霜高鷹隼淩霄健風淡牛羊出牧閒行處
漫傾村店酒帽簷插得菊花還

海天吟

南溟萬古滔滔流中有三山日照之神洲仙人騎鯨歟隱
見破浪忽到東南頭鐵城錦水一都會羣山萬壑開遐陬
七星峯上瓊花發五桂巖邊琪草幽疑從十洲三島分此

境離離員嶠波間浮金屑垣桂花村香山別號何須秦時桃花
源我住花村最深穩夜夜海月照我門珊瑚寶樹出海底
明珠簸弄蛟龍吞天風吹月海山白仙人與我傾芳樽遙
指海水千尺深琅琅高歌海天吟海波連山高接天天上
靈妃顧嫣然會當乘槎牛斗邊

秋日過三元宮山館聽越塵道人彈琴

時越塵擬游羅浮

越岡之麓屋數椽蕭疎草樹涼娟娟青山一角橫竹牖殘
陽半壁聞風蟬高秋過此不忍去道人招手何歡然棲心
早歲游物外風姿俊爽神高騫道書愧我未曾讀石室且
喜來談玄清琴妙得沈夫子飯罷爲我彈五絃平沙古調
最清越恍惚雁落涼風天遲迴更奏漢宮秋和平幽怨情
意傳聞師正有羅浮興抱琴好坐飛雲巔黃龍白鶴在眼

前琪花瑶草紛巖邊石樓三更日已縣鐵橋縹緲來羣仙
此時左顧白玉蟾石挹葛稚川何必海上呼成連嗟余安
得躡屐從師往四百峯頭吹遂眠

奉贈鄭侍御貫亭先生

天南正氣著蘭臺松桂林中見雅材驄馬乍從京國返素
車旋別故山來時赴弔馮魚山先生朝端風度張金鑑海內文章董
玉杯梓里蒼生皆引領仁言還望澤蒿萊

羅浮放歌

我思太古洪荒來川澤融液山胚胎水流山峙天地奠更
有離合何奇哉堯時九年嗟瀕洞禹甸九土猶蒿萊水患
懷襄極汎濫山疑飄蕩無根荖相傳神山在渤海三峯上
聳金銀臺一朝蓬萊失左股南溟湧出浮崔嵬巨靈有意

故附會羅浮合并難中開鐵橋橫互入雲漢造物好奇爲
此玩兩儀原自太極生二山定有元精貫曠觀五岳鎮中
原衡山乃在諸夏半羅浮徒以佐命名傑出空負炎州冠
北岳旣臨北地隅南岳合居南海畔不爾當推粵嶽崇肇
錫嘉名成壯觀仙居第七古洞天畸人逸士求神仙稚川
獲得丹砂日安期不遇祖龍年竹符丹竈本荒忽靈禽異
蝶還蹁躚逃名洗耳來古澗盡醉賣酒餘平田當時周濂
羅豫章諸鉅公流連景物茲山中儒先豈有煙霞癖山水偶
契仁智胸粵洲祖泰泉翁居山著述侔化工圖經特爲闢
眞面賢關何意埋荒叢今秋我來追奇蹤遙探四百三名
峯飛流萬丈白練素列岫千朵青芙蓉出門前導呵啞虎
入室近玩摩銅龍忽看雲氣驟彌合翻似海色翻鴻濛陰

晴朝暮各變態淡濃遠近紛修容荒村幾度綻梅萼古亭
盡日吹松風蠻煙蠻雨憶坡老參橫月落懷師雄我生未
得游五岳五岳披圖思大略莽蒼崇宏定有餘幽秀靈奇
當不若我與山靈信知己山靈於我如有約使我來時風
日佳天公爲我淨林壑題詩何必碧紗籠放懷且倒金樽
酌

三到羅浮口號

名山似約我長來四百芙蓉拂面開儻遇麻姑話塵世三
番清淺見蓬萊

張鑑字春治號秋水烏程人嘉慶甲子副貢官武義教

諭有冬青館集

詩話秋水根柢經史兼通天算文辭尤典雅阮文達
立詁經精舍秋水爲高材生佐修鹽法志經籍纂詁

所自爲書三百餘卷晚病風痺遂自名爲風號貞疾
居士諸書雖寫定多未及刻播文勤公爲刻數種近
劉氏嘉業堂又刻其詩文集散佚尙多

七月二十五日同人登寶石山天然圖畫閣過雨和

楊傳九用樊榭韻

佛閣梯枕拔衽登四山涼翠記來曾白蓮社肯孤良友壤
色衣須借病僧拾果野猿窺石礪聽經仙鼠拱秋藤他時
再結宗雷約莫道攢麋我未能

歸雲庵懷孫太初

不見孫高士風流自昔聞湖山留舊社風月冷歸雲飄影
離言說松聲澹俗紛幾回參嘯旨蠹葉滿斜曛

舟中望道場山

瓜皮艇子盪空濛森森寒流瑟瑟風白塔紅亭遙望處不

知身到水晶宮

秋螺如笑幾回看倚櫂城根日又殘
好是浮萍吹斷影雲屯浪湧作秋寒

穆彰阿字鶴舫滿洲旗人嘉慶乙丑進士改庶吉士授
檢討官至文華殿大學士有澄懷書屋詩鈔

感遇

御風入閭闔縹緲蓬萊游丹闕互紫宮
瑤府結瓊樓玉皇數召見絳節垂華旂
香案繙寶籙衆仙非我儔下士未聞道
汨彼塵土謀丹砂治不成聚語徒啾啾

滔滔堯舜朝翼翼皋夔佐懷古慙吾才
綱紀曷宜播剛毅近剽悍寬柔或選悞
更絃懼簪旌因轍太委情譬彼鼎黃耳
覆餗誰能那懋懋恭朝夕庶以寡吾過

何凌漢字雲門一字仙槎道州人嘉慶乙丑三甲三名

進士授編修官至戶部尚書謚文安

詩話文安初以拔貢官吏部旋登上第遇翔臺省屢持文柄尹京兆最久後又以少宰兼領理繁治劇不動聲色畿輔肅然

荆卿故里

天帝方醉秦於燕復何有遂令國士心取亡由匕首劍術豈云疏生劫僅差後報韓奮鐵錐當年能中否博浪尙可逃繞柱那可走得失論英雄易水應悲吼

姚元之字伯昂號鴈青桐城人嘉慶乙丑進士改庶吉

士授編修歷官左都御史降內閣學士有鴈青集

姚石甫曰吾家鴈青侍郎不以詩鳴乃古近諸作雅託唐音綿邈其思俊逸其氣清辭麗句不絕於篇雖不同晉楚楚稱雄亦屹然周宋王者之遺矣

詩話薦青文翰從容雅負時望詩俊亮有格亦多寓
感時紀事之作所著竹葉亭筆記多載舊聞國故分
隸爲世所珍畫筆精妙小品尤超逸有南田
新羅遺意前輩風流令人作貞元朝士之想

廷尉

廷尉天下平國法無偏陂如何民命輕但伺長官意有客
顏比桃花紅出入宮門氣如虹升堂指畫生疾風怒雷奔
電來天東死囚累累不敢窮明朝薦牘上九重巨案曲盡
稱全功功者色欣欣裘馬歸西園長筵集僚友列坐道辛
勤珍錯羅列雜蒸豚狂呼大叫酒千尊自言折獄如有神
賓從咸歎息僕御亦翩翩我聞紅陽教十人九死空全村
不知漢世駟馬門朱紫誰氏之子孫

正一真人一

寬衣大袖來青冥手持一紙書黃靈云是正一真人之法

曹綠章封事奏帝庭鄧馬元帥開九閣下情一一天爲聽
眞人之權吁若是干妖萬怪不敢肆昨者東鄰村有妖亂
捉人晝伏不出夜恣行攫取帛與財魚肉老與嬰土神無
如何愁苦不得明眞人爾爲天帝之耳目何不直陳帝所
使得寢其皮食其肉羣醜聞風皆竄伏豈惟東村普天之
福

禮烈親王骹箭圖

箭髀頭圖九寸六觚皆穿

烈王大箭無箸盧剡木九寸穿六觚開圖睥睨天門驅兩
眼不敢相闖闖我王大野橫雕弧長鏑一吼山谷驅黑雲
退飛天東隅海水倒立失蓬壺賁育咋舌心轆轤挾幹夜
走養大夫松山杏山雪模糊一鏃能使萬骨枯長城洞開
日月扶帝曰奇勇王拜呼投弓一笑天下酺憶昔 太祖

射洞城棟鄂膽裂金鏤明昔太祖憩洞城之野有棟鄂指百步外柳侑之射發五矢中三矢上下相錯神武天
太祖親射五矢皆中眾視之五矢所集僅五寸許
縱非人能超軼萬古王克承錫以彤弓載以銘森闕武庫
鬼莫撓王攀龍髯上太清王遺白羽殺欃槍餓鴟夜叫秋
風驚散箭猶在王如生嗟爾天狼敢橫行

虎門行

東方日出天爲紅明霞萬疊排秋空水光倒射搖五色黃
人矗立摩青銅攢峯列嶂隱青翠芙蓉亂插滄波中天雞
大叫洞窮髮豁達不覺空雙瞳我聞昔者此水東馬銜當
蹊挈海童朝游大鵬夕雞籠明璫大髻坐艤艫船頭伐鼓
聲逢逢鮫人蜃人怒髮衝瞪目不敢偏師攻赫赫重臣總
元戎慨然追慕郭令公輕舟一葉無短篷獨立虎門呼其

雄告言聖恩寬且洪刀斧不肯膏閭閻羣焉蹈舞聲呼嵩
爭先叩頭輸厥衷水師不用占天弓儵忽萬里無飛蓬爾
來日照黃金宮鬼物懾伏天吳窮河泊使者休赤駿黑齒
國人歌來同方壺員嶠遙相通飛檣上下如游鴻元虛作
賦狀莫終二李將軍畫難工少文虛願何足論我來不待
乘長風

送王鹽官壽齡之江南

想君吳會去落葉過江初白雁迎朝雨丹楓照夜漁官閒
身似客俸少食多魚淮海通津淀知應有尺書

過懷雲庵故園有感

猶是看雲地雲歸人不歸亭邊霜葉下門外野禽飛落照
無今昔清琴失是非空餘七絃在長自挂羅幃

宿遷道中

栗烈歲云暮我行徐楚間
日落淮陰市風生芒碭山
鳥邊白雪下天末野鷗閒
一倍傷行旅孤雲猶往還

溫泉

烈炬煙銷水未乾
華清金粉又凋殘
久無香殿堪尋桂
尙有荒池想浴蘭
秋雨落花金屈戌
野風別燕玉闌干
鳴泉若解興亡恨
流到驪山應自寒

寄蓬萊太守張船山夫子

蓬萊仙吏出塵姿
管領神山鬢未絲
堂上琴懸無長物
郡中烏集已多時
仙人樓閣春長住
水國煙波秋到遲
出海雲霞天五色
不知何似使君詩

江上

百道晴雲下翠微一帆秋影滯寒暉
流泉鳴玉涓涓嫩野雀爭林軋軋
飛砮杵定從今夜急星辰都爲月
明稀長江儘許看山色青靄其如
對素衣

童槐字晉三一字樹眉號萼君鄞縣人嘉慶乙丑進士
歷官通政司副使有今白華堂集

夜抵園寓

奔車息雷響序櫟發夜警花柳霏春煙罩此蓬壺境上樓
拓水窗鐙前立山影

阮芸臺師招入武林學院署下榻定香亭

龍門高築著書臺特許侯芭問字來幕下有花憐相府座
中無客不仙才鏡心朗映迴瀾水屐齒香黏稱意苔誰識
夜涼人靜後影橋獨鶴正徘徊

出古北口

雲黑秦牆戍火殘
蠶房谷口冷旌竿
宵程塞漠隨鴻度
秋色關門立馬看
地過中原山設險
天垂北斗月爭寒
甌廬一夜歡聲起
列部來瞻天可汗

題儀親王所貽蕉扇

不待招風向石欄
淡黃一片夏生寒
翦來摩詰圖中影
抵得梁園雪後看

蔣詩字泉伯號秋吟仁和人嘉慶乙丑進士改庶吉士

授編修歷官御史有榆西仙館初稟

詩話秋吟以庶常與修高宗實錄先授編修及遷
待御巡南城日結積案數十起頗有能聲磨勘秋審
冊改情實爲緩決者數案吏稱其允罷官後壹意著
述尚書毛詩皆有詮釋他如河防海運織輔水利墾
濬兵備爲書數百卷詩質實不尚藻采蓋其餘事也

舟中除夕

舟行逼除夕，悵悵欲何之。
歲暮天涯客，關河此夜思。
更深人語寂，雨急漏聲遲。
獨坐篷窗下，無心對酒卮。

送陳進士

白雲

歸夢各迢迢，西風柳盡凋。
勸君一杯酒，明日渡寒潮。
惜別無多語，難堪是此宵。
知交相繼去，吾意更蕭條。

石棣元字鏡心，宿松人。
嘉慶乙丑進士，改庶吉士，授編修。
有清貽館遺藁。

磁州道中

兩岸垂楊印碧痕，一灣新漲護柴門。
青疇過雨濃如畫，疑是江南水竹村。

月夜泛舟

遙峯幾疊暮雲含獨泛扁舟下碧潭兩岸漁歌一溪月煙
波深處夢江南

分經臺

千古鴻文歸選手危樓百尺昔傳蕭偶來淨域分經卷又
見高臺接斗杓貝葉一編參上座煙花三月話南朝祇今
古寺空山裏梵唄鐘聲自暮朝

陳鴻墀字範川嘉善人嘉慶乙丑進士改庶吉士授編
修罷起授內閣中書有抱簫山道人遺橐

獨坐館中校閱全唐文制誥類遲平叔不至

杏花已過桑葉稀禁中清晝雙掩扉官人不來吏卒散我
獨兀坐蟠孤巖榻塵小拂試方麴硯垢細滌研隄麋唐賢
著作橐盈屋制誥一體尤乖離王言首輯冠眾集治水先

冀餘梁岐編排鱗次苦蕪穢亂髮未斬猶夢絲割裂苦碎
百衲錦合并強集千羊皮缺文頗疑石鼓古誤字恐受金
根嗤參以眾書見同異覈以正史無紛歧刪除肯使禾莠
雜選擇要辨熊蛙肥當時承旨況專職燕許手筆何淋漓
翰苑諸集幸可考奚必掩取臣工爲麻沙百過日生眩鐵
摘三絕手盡牋胡爲宋五慣坦率張目不見干珠璣有時
強作解事語武斷若判公堂詞古人飲泣後人笑餐錢月
給眞虛糜鯁生持論少同調賴有孫楚堪我師糾謬時時
恕吳纘列銜往往容臣祁晨趨共聽禁鐘細暮歸每趁歸
鴉遲窮通豈恃三寸管祕文校理臣所司謝安捉鼻恐不
免讀書要及投閒時上方筆札敢輕費好趁官燭難雙枝
詩成火速付急遞新月已照黃琉璃

贈徐白舫吏部

詩

男兒墮地須錢刀坐縱千古錢神豪紛紛俗子何足數呼
叱奇傑同兒曹南州徐君今孺子雅擅洪筆驅風騷詩宗
韋柳足高格真趣亦近柴桑陶曹司趨走未十載上官不
喜同官嘲倉庾之職不稱意一朝徒步還東臯先生風義
凌雲霄迴如孤鶴不可招自非寒餓受驅迫肯以玉貌來
塵囂嗟予坎壈略相似七年史館儕宮僚朱雲屢忤貴人
貴仲舒獨抗驕王驕中書君今老且禿排擠出力煩中朝
上書光範陋軒冕拂衣蕭育歸衡茅歸來謝客合高卧亦
復萬里浮輕舸半生強項忽低首感君令我心煩忉我知
造物忌孤潔況有筆舌能誅褒詆訶公卿及將相糞土朱
紫兼麾旄儻教飽食逞胸臆世界不足嘗毫毛天公欲貶

壯士骨妻子坐折高人腰予之齒者必去角人生快意安
能遭豈知倔強性到底千磨萬折終不搖君也負米乞友
助豈學雁鶩吞腥臊授徒我自食我力詎必千萬書黃標
心能不貪氣益壯我自有主神難操君聞我言釋然喜手
擘鮮荔傾香醪片帆高挂豫章去我亦歸溯之江濤雞蟲
得失太瑣碎出門一笑蒼天高

哀學使

甲午正月十八日廣東育學使者李君泰交晨起自縊死遺書具言爲怨家所搆請一死

自明以其輕生弗與直也哀其志者作詩云爾

學使夜宴朝自經大吏往視聞哭聲父涕不止弟跪迎遺
筆慘淡訴不平云有同鄉合浦令正機其名何其姓明欺
暗算事不定一死上報天子聖大吏馳驛聞學臣言有因
去夏試廉州說令書云云令上謁面請託未可知通惡幕

事下太守張太守上狀鈐以章令無夤緣內外作好事反覆不及請託字科場請託吁可驚按律不問行未行當時不難攝令使對簿移書學使指實期分明兩造具在事立辨是豈疑獄憂難成學臣返旆況屢見語不及此非人情安人息事亦政體詎料貴客能捐生卽今此獄莫窮竟誰起九原同折證或傳牘背奴有詞渡海風濤得心病海外歸來正及秋歷試廣惠潮三州不聞心病致恍惚渡海安穩有弟同歸舟此爲致死由此語恐未實披髮何由訴大荒苦海魂迷招不得吁嗟乎昔之學使在教士今日好官足歡喜君亦猶夫眾人爾君知畏君知恥慮汙名乃至此人皆覲然生彼獨貿然死律以大義無恕詞苟非其人莫輕訛寄語大吏弗爾惱富貴由來多壽考

錢心壺給諫儀吉至

火雲兀兀閉門居客到驚心萬里餘險絕江湖羣盜路訛
傳風影遠人書最憐弱小猶孤艇急掃軒窗當做廬秉燭
相看眞夢寐滄桑重話十年初

驄馬威聲道路寒早聞清望重臺端誰令海上鼉鼉窟爭
識朝中獬豸冠命代文章傳世定還家歲月閉門難憐予
視草花甌久老看天南荔子丹

晚晴簃詩匯卷一百十七終